

Allannguutissatut siunnersuut

uunga

**Uunga siunnersuut: Nunami inuussutissarsiutinut tunngatillugu inuussutissarsiormik siuarsaaneq pillugu Inatsisartut inatsisaata allanngortinneqarnera pillugu Inatsisartut inatsisissaat**

(Annikitsunik taarsigassarsititsisarnermik aaqqissuussinermi atorunnaarsitsinissamik ulluliinerup atorunnaarsinneqarnera, qinnuteqartunut piumasaqaatinik sakkukinnerulersitsineq, pisortanut annertuunik akiitsulinnut tapiissuteqartarnerup killilerneqarnerata atorunnaarsinneqarnera aamma allatigut oqaasertalersuinerni allannguutit annikitsut)

Pingajussaanneerpeqarnissaanut Naalakkersuisunit saqqummiunneqartoq

Siunnersuutip qulequtaanut

1. Siunnersuutip qulequtaa imatut oqaasertalerneqarpoq:

**”Uunga siunnersuut:**

**Nunami inuussutissarsiutinut tunngatillugu inuussutissarsiormik siuarsaaneq pillugu Inatsisartut inatsisaata allanngortinneqarnera pillugu Inatsisartut inatsisaat**

(Annikitsunik taarsigassarsititsisarnermik aaqqissuussinermut atorunnaarfissaannut ulluliussap atorunnaarsinneqarnera, qinnuteqartunut piumasaqaatinik qasukkartitsineq, inunnut pisortanut annertuunik akiitsulinnut tapersiinissamut killiliinerup atorunnaarsinneqarnera aammalu aaqqissuussinermi allanngortitsinerit annikinnerusut allat)”

§§ 1-2-mut

2. §§ 1-2 imatut oqaasertalerneqarput:

**”§ 1**

Nunami inuussutissarsiutinut tunngatillugu inuussutissarsiormik siuarsaaneq pillugu Inatsisartut inatsisaanni nr. 20, 3. december 2012-imeersumi, Inatsisartut inatsisaanni nr. 4, 3. juni 2016-imeersumi, Inatsisartut inatsisaanni nr. 27, 17. november 2017-imeersumi aamma Inatsisartut inatsisaanni nr. 21, 1. december 2021-meersumi allanngortinneqartumi, makkua allanngortinneqarput:

1. Inatsisartut inatsisaata qulequtaa imatut oqaasertalerneqarpoq:

1

”Nalinginnaasumik inuussutissarsiutinik siuarsaaneq pillugu Inatsisartut inatsisaat.”

**2. § 1 b, imm. 1, imatut oqaasertalerneqarpoq:**

”Suliffeqarfiit minnerusut aningaasalersuutissarsiniartarnerisa ajornannginnerulersinnissaa siunertaralugu, annikitsunik taarsigassarsititsisarnermik aaqquissuussinermut aningaasalersuutissanik, aningaasaliissutinik ataatsimoortunik pilersitsisoqassaaq.”

**3. § 1 b, imm. 3, atorunnaarsinneqarpoq.**

**4. § 2, imm. 1, imatut oqaasertalerneqarpoq:**

”Inatsisartut inatsisaanni nalinginnaasumik inuussutissarsiutinut tapersiisarneq pineqartunut ilaatinneqarpoq.”

**5. § 7, imm. 4, oqaaseqatigiit aappaat, imatut oqaasertalerneqarpoq:**

”Ingerlatsinermi aningaasaqarnikkut nalilersuinermi qinnuteqartup sulianut aqutsinermullu piukkunnassuseqarnerinik, qinnuteqartup aningaasaqarneranik aammalu ingerlatsinissamut pilersaarutip aalajangersimasup attanneqarsinnaaneranik nalilersuineq ilaatigut ilaatinneqassaaq, taamaattoq takuuk imm. 5.”

**6. § 7-imi, imm. 5-itut ilanngunneqarpoq:**

” *Imm. 5.* Tapersiinissaq annikitsunik taarsigassarsititsinertut ittoq pillugu neriorsuuteqarneq, qinnuteqaatip ingerlatsinermut aningaasaqarnikkut inuiaqatigiillu aningaasaqarnerannut nalilersorneqarnera tunngavigalugu tunniunneqassaaq. Ingerlatsinermi aningaasaqarnermut nalilersuinermi, ingerlatsinissamut pilersaarutip aalajangersimasup attanneqarsinnaassusaanik nalilersuineq, taamaallaat ilaatinneqassaaq.”

**7. § 8, imm. 2, imatut oqaasertalerneqarpoq:**

” *Imm. 2.* Tapiiffigineqarnissamik neriorsuummik tunniussisoqarsinnaanngilaq, pissarsisussaq imaluunniit pisortaaneqarfimmi siulersuisuniluunniit inuit aqutsisuusut akileraartarnermi inatsimmik annertuumik unioqquutitsisimasutut imaluunniit Kalaallit Nunaanni pinerluttulerinermi inatsimmi aningaasarsiornermi pinerluuteqarnermut aalajangersakkanik unioqquutitsisimasutut pineqaatissinneqarsimappata imaluunniit pisortanut akiitsoqarpata annertuumik akiligassanngorsimasunik, taamaattoq takuuk imm. 3.”

**8. § 8-mi imm. 3-tut nutaatut ilanngunneqarpoq:**

” *Imm. 3.* Annikitsunik taarsigassarsititsinissaq pillugu neriorsuuteqarnermi, qinnuteqartoq pisortanut annertuumik akiitsoqarnersoq, isiginiarneqassanngilaq.”

Imm. 3 tamatuma kingorna imm. 4-nngorpoq.

## § 2

Inatsisartut inatsisaat ulloq 1. januar 2025 atuutilerpoq.”

Siunnersuummut nassuiaatit

**Nassuiaatit nalinginnaasut**

Allannguutissatut siunnersuummut siunertaavoq, Inatsisartut inatsisaata kalaallisoortaata aamma danskisoortaata oqaatsitigut imminnut naapertuunnerannik qulakkeerinissaq.

Tamatuma saniatigut, taamaallaat annikitsunik taarsigassarsititsinermut piumasaqaatit, qinnuteqartup naammassisimasassaasa, qasukkartinneqarnissaat, siunnerfigalugu allanngortitsisoqarpoq.

**Inatsisissatut siunnersuummi aalajangersakkanut ataasiakkaanut nassuiaatit**

*Nr. 1-2-mut*

Siunnersuutip nutserneqarnera pillugu allannguutissatut siunnersuummi nassuiaatit nalinginnaasut innersuussutigineqarput.

Tamatuma saniatigut allannguutissatut siunnersuummi § 1, nr. 5-8-mi allannguutit ilanngunneqarput. Taamaallaat annikitsunik taarsigassarsititsinermut piumasaqaatit, qinnuteqartup naammassisimasassaasa, qasukkartinneqarnissaat qulakkeerniarlugu allanngortitsisoqarpoq.